

սը պատկանում է 12-րդ դարի վերջերքին և 13-րդ դարին: 10 և 11-րդ դարերի արձանագրութիւնների թիվը 6 է, 12—13-րդ դարինը՝ 126, իսկ 14—19-րդ դարերինը, միասին վերցրած, ընդամենը՝ 62:

Այս երևույթն աչքի է ընկնում նաև Սանահինց դուրս, Հայաստանի բոլոր այլ հնավայրերում: Կոստանյանցի «Վիմական տարեգրի» մեջ հավաքած թվական ունեցող արձանագրութիւնների բացարձակ մեծամասնութիւնը դարձյալ պատկանում է 12-րդ դարի երկրորդ կեսին և 13-րդ դարին:

Սակայն, այստեղ աչքի է ընկնում մի հետաքրքիր հանգամանք, դա այն է, որ երկրի սոցիալ-տնտեսական և քաղաքական կացութեան հետ միասին զանազան դարերում փոխվել է նաև վիմական արձանագրութիւնների բնույթն ու բովանդակութիւնը:

Մարդպանական շրջանից մեզ հասած վիմական արձանագրութիւնները թվով քիչ են, բայց բոլորն էլ շինարարական բնույթի են: «Վիմական տարեգրի» մեջ մինչև 8-րդ դարը կան ընդամենը 9 արձանագրութիւն, դրանցից մեկը պատկանում է 13-րդ դարին և սխալ ընթերցումով ստացել է հայոց ՁԵ (85 + 551 = 636) թվականը: Դրա վրա պետք է ավելացնել հարյուրավորի Ո կամ Չ գրերը, որ կոարված է: Մնացած ութ արձանագրութիւնները, որ անկասկած 6 և 7-րդ դարերին են պատկանում, բոլորն էլ վերոհիշյալ բնույթի են:

8-րդ դարում, երբ Հայաստանում արաբներն էին իշխում, ոչինչ չի կառուցվել: Այդ դարին պատկանող ընդամենը երեք արձանագրութիւններից միայն մեկն է շինարարական բնույթի, այն էլ վերաբերում է Թալինում աղբյուր շինելուն: Մնացած երկուսը տապանագրեր են:

9-րդ դարի առաջին կեսից «Վիմական տարեգրի» մեջ ոչ մի արձանագրութիւն չկա, որովհետև այդ ժամանակը հայերի ապստամբութիւնների և արաբների դաժան ճնշման տարիներն էին, իսկ երբ 862 թվականին Հայաստանը քիչ թե շատ ինքնուրույն դարձավ, և Աշոտ Բագրատունին իշխանաց իշխան ճանաչվեց, Հայաստանում սկսվեց շինարարական նոր դարաշրջան գլխավորապես Բագրատունյաց, Արծրունյաց և Սյունյաց նախարարութիւնների սահմաններում, որ

տեևց մինչև սելջուկյան ավերիչ արշավանքները 11-րդ դարի կեսերին:

Այս խոշոր վերելքի ժամանակաշրջանում շինվում են քաղաքներ, կամուրջներ, իջևանատներ, բերդեր և բազմաթիվ վանքեր ու եկեղեցիներ, որոնց թվում նաև Սանահինն ու Հաղբատը:

Այդ մասին բազմաթիվ կարևոր տեղեկութիւններ են հաղորդում վիմական արձանագրութիւնները և մեր հին մատենագիրները: Այդ միջոցին շինարարութեան գլուխ կանգնած են եղել հայոց թագավորներն ու նրանց վասալ իշխանները: Վանքերը, տընտեսական կայուն հիմքերի վրա դնելու նպատակով, նրանք մշտական եկամուտի աղբյուրներ են հատկացրել նրանց, նվիրաբերելով տուրքերից ազատ կալվածքներ, խանութներ, ջրաղացներ, ձիթհանքեր և այլ անշարժ գույք:

Շինարարական և տնտեսական խոշոր վերելք ապրեց Հայաստանը նաև 12-րդ դարի վերջերքին և 13-ի առաջին քառորդին, երբ Հայաստանի մի զգալի մասն անցավ հայազգի Զաքարյան իշխաններին:

Սակայն այդ բոլորին վերջակետ դրվեց Զալալեղդինի (1225) և մանավանդ մոնղոլ թուրքերի արշավանքներով, երբ ժողովրդի մեջ առաջ եկավ հուշալքում: Հսկայական չափերի հասավ երկրից դուրս գաղթելու ազգակործան երևույթը: Գաղթում էին և՛ իշխանները և՛ քաղաքացիները և՛ հողի հետ կապված գյուղացիները: Մարդիկ իրենց միակ փրկութիւնը կապում էին եկեղեցու և հանդերձյալ կյանքի հետ, այդ պատճառով իրենց գույքը, այգիները, հողը, ամեն ինչը նվիրաբերում էին վանքերին ու եկեղեցիներին՝ իրենց հոգու փրկութեան համար:

Այս շրջանի վիմական արձանագրութիւնների մեծագույն մասի բովանդակութիւնը նվիրատվական է: Դրանք փաստորեն պայմանագրեր են վանքի միաբանութեան և նվիրատուի միջև կնքված՝ այն մասին, որ տրված նվերների դիմաց վանքի միաբանութիւնը յուրաքանչյուր տարի նշված օրերին պետք է ժամ կամ պատարագ մատուցի նվիրատուի արեւատութեան համար կամ հիշատակին:

Այս շրջանում մեծ տոկոս են կազմում խաչքարերի և դերեզմանաքարերի վրա եղած արձանագրութիւնները: Խաչքարերն էլ մեծ մասամբ կամ գերեզմանաքարերի գլխին են